

Pedru kute memã atãri pi'ôk no'ôk ne ja.

Jejukôt ba djwýnhbê Pedru ajte arkum pi'ôk no'ôk ne. Tyk kêtri ne arkum pi'ôk no'ôk ne. Tekrekam Metĩndjwýnh kabên jarênh djwýnh 'êxnhĩ bôxmã ne arkum arê ne kam arkum,

—Dja gar Jeju'ãbit angràn amũ aje maro amikamênh kadjy katàt ar amijo aba. Akati 'ôkam dja Jeju akubyn bôx ne pyka jao apêx. Kam dja ar amã pyka jakam kukràdjã kĩnh rax kêt. Dja i apêx gwaj Jeju akubyn bôx kamnhixbê ar baba. Nãm ã Pedru arkum ane.

1 ¹Ba ibê Ximão Pedru. Jeju Kritu ne ijano ba 'ã idjujarênh ar iba. Ba ne ba ar amã ikabên ne. Gwaj Batĩndjwýnhmê gwaj bapytâr djwýnh ar ta ne ar arým gwaj bamã axwe kêt jarê. Jeju Kritubê ne gwaj bapytâr djwýnh. Ar ta ne ar gwaj bamã axwe kêt jarê gwaj arým tu amim markumrêx ne bamã kĩnhkumrêx. Ar amã ne ba ikabên jarê.

²Gê Metĩndjwýnh tu kum ar akaprĩ:kumrêx^a gar adjumar mexo amũ amikamên arým adjumar mexkumrêx ne.

Me ba mex'ã kute memã karõ.

Kô k 1.4

³Metĩndjwýnh ne mexo uma:n prĩne mex ne axwe kêtumrêx. Arým amiwýr gwaj bajuw gwaj tu amim markumrêx nhym 'itýxkôt arým gwaj bamã Karõ jano. Ne gwaj bamã kabên jarê gwaj arým bamã kĩnh ne kôt ar amijo baban kam arým kôt batĩn ne ar baba rã'ã: rã'ã ne. Gwaj kam bajaxwe kangan bamex prãm. ⁴Kôt ne kute gwaj bamã mýjja jarênh mãmđji. Kute gwaj bamã mýjja mexti:rekumrêx jarênh. Dja gwaj amiwýr mýjjakam amakbê ta mexo bamex. Ja kadjy ne gwaj bamã mýjja mexti:re jarê. Me kum Metĩndjwýnh kĩnh kêtja ne me mýjja punu kumexo ba. Me 'êxnhĩ. Me kum me kurê. Me ari prõ, mjên kupa'ã kurê ba. Me mýjja punu kumex jao ba. Gwaj ba dja gwaj bamã mýjja punu kĩnh kêt ne tu kangakumrêx. Ja kadjy ne Metĩndjwýnh gwaj bamã mýjja mextire jarênh mãmđji.

⁵Kute gwaj bamã mýjja nhõrmã arênhkam

^a1.2 Djãm ar ga ne gar adjukaprĩ nhym pãnh arým kum ar akaprĩ Kati. Ta ne tu kum ar akaprĩkumrêx.

dja gar amikrà kêt ne amex. Arÿm ar aje tu amim Metĩndjwÿnh markumrẽxkam dja gar amex.

Amex ne ajte Metĩndjwÿnh mar mexo amũ amikamẽn mar rax ne.

⁶ Metĩndjwÿnh mar rax ne ajte ajaxwe kêt kadjy amijãno dja.

Ajaxwe kêt kadjy amijãno djan ajte Metĩndjwÿnh kôt ar amijo aba.

Kôt ar amijo aba'ã adjukanga kêt.

'Ã adjukanga kêt ne ajte mex kôt amex.

⁷ Mex kôt amex ne ajte Jeju kukwakam akamy arkam adjukaprĩ.

Arkam adjukaprĩ kute me axikôt apôx abenkam ukaprĩ pyræk.

Arkam adjukaprĩn ajte amã me kunĩ jabẽ.

⁸ Dja gar ã aba mexo anen aba mexo amũ amikamẽn aba me:xkumrẽx. Ga, pidjô ô me:xkumrẽxa pumũ. Nhym me kum kĩ:nhkumrẽx. Ne kam kam kaprĩ kêtumrẽx. Ar gadjwÿ dja gar aba me:xkumrẽx ne akajgo kêtumrẽx nhym Bẽnjadjwÿr djwÿnhbẽ Jeju Kritu arÿm kum akĩnhkumrẽx ne akam kaprĩ kêtumrẽx.

⁹ Nhym be, godja gar ajô aba mex kêt ne aba punu jabej. Aje mrãmri ne me no rã kute amybÿm mÿjja pumũnh kêt pyræk ne aje mar rerekre. Metĩndjwÿnh ne arÿm ar ajaxwe tũm maro aknon akam ngryk kêt. Nhym be, ar ga ne gar arÿm jao ajamak kêt katin arÿm mar kêt ne.

¹⁰ Kam, akmere, àpnhire ar, amibẽx ne markumrẽx. Djãm mrãmri ne Metĩndjwÿnh amijo ar apytàn amiwÿr ar ajuw ne ar ajo bakumrẽx? Ja dja gar amibẽx ne markumrẽx. Ne kam arÿm amim,

—Nã. Mrãmri ne Metĩndjwÿnh arÿm amijo ipytàn ijo bakumrẽx, ane. Dja gar ije ar amã arẽnhja kôt amijo aba mex ne kam Metĩndjwÿnhbẽ amijo akẽx kêtumrẽx.

¹¹ Dja gar aba mexo ane nhym kam arÿm Bẽnjadjwÿr djwÿnhbẽ Jeju Kritu bõx. Kubẽ ne gwaj bapytår djwÿnh. Dja bõx ne ô kàjkwamã ar ajo mõn ar ajo bõx ne arÿm ar amã,

—Aj. On amrẽ wadjà. Ota, ar anhõ mÿjja mexti:rekumrẽx. Ba dja ba ar ajo iba. Jakam dja ba me kunĩ:o iba rã'ã: rã'ã ne, ane. Dja gar pykakam aba mexo ane nhym arÿm ar ajo bõx ne ã ar amã ane.

Metĩndjwÿnh kabẽn pÿnh ne kute memã arẽnh.

Ep 4.1; Kor 1.10; Ped k 1.15; Ap 3.4

¹² Kam dja ba ije ar amã ar aba mex ja'ã karô 'ãno dja. Arÿm ne ba ar amã tãm jarẽ gar arÿm aman arÿm kôt amijo aba mex. Kwãrĩk wãnh rã'ã. Dja ba ajte ar amã tãm jarẽn ajte ar amã tãm jarẽ gar arÿm mar tÿx ne. Ne kam aba mex'ã adjukanga kêt.

¹³ Nã bãm amim,

—Pykakam itũn ne ar ibari dja ba mã arkum arẽ gẽ ar mar tÿx. Tãm ne mexkumrẽx. Nã bãm ã amim anen kam arÿm mã ar amã arẽ. ¹⁴ Mrãmri ityk arÿm ijo rãm ne ja. Bẽnjadjwÿr djwÿnhbẽ Jeju Kritu ne imã arẽ ba arÿm kuma. Ga, kubẽkàtio kikreja pumũ. Nãm me kungràn arÿm mã tẽ. Badjwÿ dja ba ty nhym

inhĩ wãnh nŏ. ¹⁵Itĩnri dja ba ar amã karŏ 'ãno dja. Ar aba mex'ã ar amã karŏ 'ãno dja. Dja ba ty gar mã aba mex ne mar tỳx ne arỳm 'ã adjukanga kêtukumrêx.

¹⁶Gwaj banhŏ Bẽnjadjwỳr djwỳnhbê Jeju Kritu arỳm bŏx ne 'itỳxkôt mỳjja pumũnh kêt nhipêxo ba. Bar memã 'ã idjujarênh ar iba. Djãm me kabênh kajgokôt ne bar amijo iban arỳm ar amã me ujarênh kajgo jarê? Kati. Djã ne me ta amim,

—Ba dja ba memã 'ã ajarênh prĩne idjujarênh irô mex gê me idjujarênh ma? Dja me kuman aben djô'ã amũ abenmã arênh ba, ane. Djã ne me ã amim anen 'êx ne arỳm amũ imã arê ba me ujarênh kajgoja man arỳm me ô'ã amũ ar amã arê? Kati. Ar ba ne bar Jeju pumũnhkumrêx ne kam kôt ar amã 'ã ajarê. Jejubê ne Bẽnjadjwỳrbê kumkatibê Kritu ne me kunĩ, mỳjja kunĩŏ ba. Bar omũn arỳm ar amã tãmja'ã ajarê.

¹⁷⁻¹⁸Amrêbê ne bar Jeju pumũ. Metĩndjwỳnh nhŏ krãnhkam ne bar djan arỳm kam Metĩndjwỳnh kabênh ma. Jejumê ro'ã ne bar djan arỳm kuma. Kakrã jadjênh tỳ:x ne me:xkumrêx ne arỳm Jeju kuno bar omũ. Nhyam kam Metĩndjwỳnh arỳm kàjkwa kurũm Jeju'ã ar imã kabênh jarê. Kakrã jadjênh tỳ:x kurũm ne ar imã 'ã kabênh jarênh kam,

—Ikra ne wã. Imã abê:kumrêx. Ba kam kam ikĩnhkumrêx. Nãm ã Jeju'ã ane bar arỳm kabênh ma. Ga, Metĩndjwỳnh, me Babãm ta kute kum rax jarênhja pumũ. Kum kĩ:nh jarênhja pumũ bar arỳm kuma.

¹⁹Be, nã bãm ar Jeju pumũn Metĩndjwỳnh kabênh ma. Nhyam be, amrêbê ne me bakukãmãre Metĩndjwỳnh kukwakam kabênh jarê. Metĩndjwỳnh ne kabênh pỳnh ne arê gwaj mar pỳnh. Dja gwaj on Metĩndjwỳnh kabênh mar 'ãno dja.

Ga, ngŏnh pŏk kryre kute akamãt kŏ tyk kurwỳja pumũ. Me'ŏ ne o akamãt kurwỳ ne arỳm amim kam mỳjja pumũnhŏ ba. Metĩndjwỳnh kabêndjwỳ dja gwaj mar 'ãno djan arỳm mỳjja mar kêt maro tẽ. Arỳm mỳjja kute apŏxmã maro tẽ. Dja gwaj mar 'ãno badjãmo tẽ:n arỳm mỳjja'ỳr o bŏx ne arỳm prĩne mỳjja pumũnh mex ne.

Ga, umajỳrti noti kàjmã mrãnhja pumũ. Kàjmã mrã nhyam me arỳm abenmã kum, “Arỳm akati 'ỳr”, ane. Nhyam kam akati ban arỳm akati nhyam kam me arỳm mỳjja kunĩ pumũnh mex ne. Gwaj badjwỳ dja gwaj Metĩndjwỳnh kabênh mar 'ãno badjãmo mŏ:n arỳm Kritu'ỳr o babŏxkumrêx. Nhyam kam arỳm akubyn bŏx gwaj arỳm prĩne omũnh mex nhyam arỳm me:xkumrêx ne dja. Gwaj kam prĩne mỳjja kunĩ pumũnh mexkumrêx.

²⁰⁻²¹Amrêbê: me bakukãmãre Metĩndjwỳnh kukwakam kabênh jarê nhyam me 'ã pi'ŏk no'ŏk ne. Djãm kabênh jarênh djwỳnh ta ne amikabênh man o Metĩndjwỳnh kabênh ne arê? Kati. Metĩndjwỳnh Karŏ ta ne ngrêk nhyam kam kabênh man Metĩndjwỳnh kabênh kŏ:t arê. Karŏkôt kute arênhkam djãm gwaj baje pi'ŏkkam kabênh jarênh kajgo ne tu kabênh mar, tu mỳjja'ã kute kabênh jarênhja mar? Kati. Gwaj ba baje tu mar kêt. Dja gwaj Karŏ kumrêx ma nhyam arỳm gwaj bajamak bŏ gwaj kam pi'ŏkkam kabênh jarê. Ne kam arỳm kôt kuma.

Me ta kute amijo 'êx ne kute Metîndjwýnh kabên jarênh.

Djuda 3

2 ¹Nhým be, me bakukãmäre kwý ne me arým amijo 'êx ne memã kum, —Metîndjwýnh kukwakam ne ba ar amã arê, anhýro ba ne arým Metîndjwýnh kupa'ã memã mýjja kwý'ã ujarênh ar ba. Ar akamdjwý dja me kwý ta amijo Metîndjwýnh mar mex ne ate kupa'ã ar amã mýjja kwý'ã ujarênh ar ba. Dja me 'êx ne kraxkam ujarênh mexkumrêx. Ne ujarênhô tẽ:n kam arým 'ênhôtkam kupa'ã ajarẽ:n kam arým me akwý noo akno. Ne arým Metîndjwýnh bê ar ajo akêx. Dja me ajte Bênjadjwýr djwýnh'ã memã kum,

—Djãm mrãmri ne Jeju me axweo pãnhkumrêx? Kati. Nãm me 'êx, anhýro ba. Anhýro ba:n arým me aêrbê tyn arým me biknor tokry djàkam akuno.

²Me 'êxnhi ja ne me prô prãm, mjên prãm ar ba. Dja me krãpti me 'êxnhi man me kôt prô prãm, mjên prãm ar ba. Nhým me kâtãm me omün arým abenmã kum,

—Be, djãm me kute amim Jeju mar wãkam me mex got? Me axwe, anhýro ba.

³Me kute Metîndjwýnh'a 'êxja dja me amim mýjja rünho atom prãm ne Metîndjwýnh kupa'ã ar amã mýjja kwý jarên arým ar anoo akno. Ga, me kute memã nêkrêx nhôr ne pãnh pi'ók kapri jamýnhja pumũ. Ar gadjwý dja me ar ajo ô nêkrêx pyræk ne ar anoo aknon arým ar abê pi'ók kapri jamý. Djãm Metîndjwýnh ate krãn ar ban kute me mar kêt? Djã nãm ôtdjwan me omünh kêt? Kati. Dja me aêrbê mrãmri memã axwe pãnh jarênhkumrêx nhým me arým me biknor tokry djàkam akuno.

⁴Djãm me axwe kajgo? Djãm pãnh kêt? Kati. Metîndjwýnh kute memã axweo pãnhkumrêx. Nhým kadjy mrãnh djwýnhdjwý, djãm kute memã axweo pãnh kêt? Kati. Pãnh ne arým apa:rmã me biknor tokry djàkam me kumê. Ne kam akamàt



(Atãri Pedru 2.6)

kô tykkam mebê ijê, mrãmri me kute kàxiràxo me lâprekam me kute mebê ijê tỳx pyràk. Dja 'âtũm nhym memã axwe pãnh jarẽnh nhõ akati arỳm bõx. Kute kam memã axwe pãnh jarẽnh kadjy Metĩndjwỳnh arỳm mebê ijê. Dja memã axwe pãnh jarẽ.

⁵Me bakukãmãre Nõwe bu'ã me jadjwỳ, djãm me axwe kajgo? Kati. Me axwe kajgo kêt. Pãnh. Nõwe te kàj bê me kute katàt amijo ba'ã memã karõo ba nhym me axwe rã'ã ne. Memã 'ã karõo ba: nhym arỳm me'ã ngô tàm ne me kunĩ nhimex ne. Nhym be, Nõwemẽ Ar kubê 7bit ne Metĩndjwỳnh ngô tãmbê ar utà.

⁶Krĩraxbê Xõtõmamẽ Gomorakamdjwỳ djãm me axwe kajgo? Kati. Kajgo kêt. Pãnhkumrêx. Arỳm ne Metĩndjwỳnh memã axweo pãnh nhym me kunĩ arỳm xêr nhym arỳm mỳjja pràbit nò. Mỳj kadjy? Bir, jakam me amakkre kêt kunĩ kute mar ne kum Metĩndjwỳnh pymamã. Ja kadjy ne ã memã axweo pãnh ane.

⁷Ne kam me'õbê Rodjwỳ. Ro axwe kêt nhym Metĩndjwỳnh arỳm utà. Xõtõmakam ne me ari prõ, mjên kupa'ã kurê ban axweti ba. Nhym Ro axwe kêt ne arỳm mekam pijàm ne kaprĩre ne. ⁸Ne me axwe kôt me omũn ne me maro ba. Ne kam me ô'a akati kunĩkôt kadjwỳnhbê tokry. Nhym kam Metĩndjwỳnh arỳm Ro pytàn arỳm me axwe kunĩ ga.

⁹Ga, Metĩndjwỳnh kute Ro pytàn mar mexkumrêxja pumũ. Me kute Metĩndjwỳnh mar ne kôt kute amijo badjwỳ ne Metĩndjwỳnh kute me utàn mar mexkumrêx. Kute kaprĩbê me utàn mar mexkumrêx. Me axwedjwỳ Metĩndjwỳnh kute mebê ijê mar. Mỳj kadjy dja mebê ijê? Bir, dja ã memã axwe pãnh jarẽ. Kute memã axwe pãnh jarẽnh kadjy dja mebê ijê.

¹⁰Me kute Metĩndjwỳnh'ã 'êxja ne me kum amidjwỳnhbito kĩnh prãm. Ne kam kum mỳjja punu kĩnh. Me ja ne ba ar amã arẽnh 'ãno dja. Metĩndjwỳnh dja mebê ijê. Me kum me rũnh kunĩ kurên kum me uma kêt. Me amakkre kêt ne amijo àmra prãm ne tĩn prãm kêt ne tu me rũnh'ã kabên punu. Me kwỳ ne me te uma nhym me 'êxnhĩja tu me'ã kabên punu. ¹¹Nhym be, Metĩndjwỳnh kadjy mrãnh djwỳnh umaro 'itỳxo kute me 'êxnhĩja jakrenh mex. Nãm me te 'itỳx djãm me kute Metĩndjwỳnhmã kum, “Me axwekumrêx”, anhỹr mã? Kati.

¹²Nhym be, me 'êxnhĩja ne me kute mry pyràk. Mỳj kadjy ne mry ar ba? Bir, me kute par ne kute kur kadjy. Me kute Metĩndjwỳnh'ã 'êxadjwỳ. Mỳj kadjy ne me ar ba? Bir, dja Metĩndjwỳnh ã meo akno nhym me arỳm me biknor tokry djàkam akuno. Me kute mry pyràk ne kute me mar kêtka tu me'ã kabên punu.

¹³Me 'êxnhĩja ne me Metĩndjwỳnh kabên kupa'ã memã arẽnh ba. Kam, dja Metĩndjwỳnh memã axweo pãnh nhym me tokry:. Nãm me pijàm kêt ne a'uri axwe ban ò kwỳ krên kôt o ikõn kam ajbãn kurê ban kam we kĩnhkumrêx. Be, me ja ne me ar amã amibên amijo amran arỳm ar aro'ã krĩn aku. Ar aro'ã akun ar amã 'êx ne ar anoo biknor ba. Ga, me kà mexkam mỳjja 'òk, me ngrã 'ã arijkam punuja pumũ. Ar gadjwỳ ne me punuo ar apunu.

¹⁴Nãm me mebê prõ nàr mjêno àkĩnh kadjy ari no prõt ne kum axwe prãm. Nhym me kwỳ kute amim Jeju mar rerekre nhym me arĩk memã 'êx ne me noo aknon arỳm amiwỳr meo akêx nhym me mekôt axwe. Nãm me kute amim mỳjja

rũinho atom kadjy no mextire ne Xatanaj man kôt ar amijo ba. Me kute mrãmri ne me tamdjwÿ kute ingêt kôt amijo ba pyræk. Metĩndjwÿnh ne amrêbê: me'ã amim,

—Me wã dja ba me kanga nhym me arÿm me biknor tokry djækam akuno, ane.

¹⁵Nãm me tu Metĩndjwÿnh nhõ pry kangakumrêx ne arÿm me bakukãmãre Barãoja kôt ar amijo ba. Bedjo kute Barão djirja kôt ar amijo ba. Me'õ ne Barãomã kum,

—Dja ga Metĩndjwÿnhbê mebê idjaer kurên kum, “Dja ga mebê idjaero ajkê”, ane. Ota, pãnh nêkrêx kumex. Nãm me ã Barãomã ane nhym arÿm kum nêkrêx kĩnh ne me kabên kôt me'ÿr tẽ. ¹⁶Me'ÿr tẽ: nhym Metĩndjwÿnh arÿm õ mrymã me kabên jadjà nhym mry arÿm Barãomã kabên ne. Bibãnh ne axwe ja nêje kum kabên nhym arÿm Metĩndjwÿnhbê me kurê kêt ne.

¹⁷Be, me kute Metĩndjwÿnh'a 'êxja ne me kabên kajgo jarênh kumex. Ga, ngômkwatikam arÿm ngô ngrãja pumũ. Me kum kôr ne 'ÿr bõx nhym kam ngô kêt ne kre kajgo. Nhym me arÿm kam kaprĩ:re. Ar gadjwÿ dja me 'êxnhĩ Metĩndjwÿnh kupa'ã ar amã mÿjja kwÿ jarê: gar aman arÿm akaprĩ:re. Ga, kakũm kôk djãbêr tÿxkam arík baja pumũ. Djãm Metĩndjwÿnh ne me 'êxnhĩõ ba? Kati. Mÿj kukràdjã punu kôt ne me ta arík ba. Kute kakũm arík ba pyræk. Kam ne me mekam kaprĩre. Metĩndjwÿnh dja tu akamàt kô tykkam me rênhkumrêx nhym me arek kam ar ba rã'ã: rã'ã ne. Arÿm ne me kadjy akamàt kô tyk dji.

¹⁸Nãm me amijo 'êx ne amijo amran mã memã kum,

—Ba ne ba ikabên katàtkumrêx, anhÿro ba. Nhym me kute amidjwÿnh kĩnh prãm arÿm mekôt axwe prãm. Nhym me 'êxnhija me kute amidjwÿnh kĩnh'ã memã àpnênhõ ba. Ne memã kum,

—Ajrã. Amidjwÿnhõ kĩnhõ aba. Dja ga ikôn kam ajbãn akurê aban abixaêr tÿ:x ne arÿm akĩ:nhkumrêx, ane. Me ã memã anhÿro ba. Metĩndjwÿnh ajbir amiwÿr meo akêxo mō nhym me 'êxnhija arÿm memã 'êx nhym me arÿm me maro ba. Ne kam arÿm Metĩndjwÿnh bẽ amijo akêx ne me 'êxnhĩ kôt amijo mō.

¹⁹Xatanaj kute me 'êxnhija pa 'amÿnh tÿx ne amipunu kôt ar meo ba. Nhym kam me 'êx ne memã kum,

—Ikabênkôt dja ga amidjwÿnhõ kĩnhõ aba. Djãm aje amidjwÿnhõ kĩnh nhym Metĩndjwÿnh akam ngrykmã? Arkati. Dja ga amidjwÿnhõ kĩnh ne arÿm akĩnhbit, ane. Me kute Metĩndjwÿnh'a 'êxja ne me ã memã anhÿro ba. Ba ar amã arê gar ama. Ga, me kute me pa 'amÿnh nhym me arÿm kum àpênh kajgo ne kaprĩ baja pumũ. Me kaprĩ ba:n te kute kubê amijo pôxmã. Me axwedjwÿ ne me axwe rã'ãn te ta axwe kêt mã. Me kute mrãmri ne me pa 'amÿnh tÿx nhym me te kute amijo pôx prãmjeja pyræk.

²⁰Bir, godja me'õ jaxweja arÿm kute amim Bẽnadjwÿr djwÿnhbê Jeju Kritu marn 'ÿr akêx, gwaj bapytãr djwÿnhja'ÿr akêx ne me kum Metĩndjwÿnh kĩnh kêt djãpênh punujabê amiptã. Ne kam akubyn me axwe'ÿr akêx ne ajte mekôt axwe jabej, mrãmri akubyn mekôt axwekam arÿm axwe ra:x.

²¹Be, katãt Metĩndjwÿnh kabên kôt kute amijo baja ne me'õja arÿm kute mar mex. Ne ren mar kêt ne ren kãjbê axwe. Nhym be, kati. Arÿm ne mar

mex. Nãm te mar mex ne arÿm kubê amijo akêx. Kam ne arÿm axwe ra:x ne. Metĩndjwÿnh me kute katåt amijo ba'ã kute memã karøkôt kabênja ne arÿm mar mex ne arÿm kubê amijo akêx ne arÿm axwe ra:x ne.

²²Amrêbê: me bakukãmãre kabên kôt ne me'ôja arÿm ã amijo akêxo ane. Me bakukãmãre memã kum,

“Ropre ne arÿm ô jaĩn. Ne kam akubyn kukrê. Nhym me te angrô jamydwÿ ku'ô nhym akubyn nykykam amirê.”

Nãm me bakukãmãre ã me kute Metĩndjwÿnh markam kute kubê amijo akêx'ã ã memã ane.

Bênjadjwÿr djwÿnh bôx djã nhô akati'a ujarênh.

3 ¹⁻²Akmerê, àpnhĩre ar, imã ar ajabê. Amrêbê ne ba ar amã Bênjadjwÿr djwÿnh akubyn bôxmã arê. Pi'ôkkam ba ar amã arê. Ne kam pi'ôk jakam ba ajte ar amã arê. Ar aje mar tÿx rã'ã kadjy. Ije ar amã arênhkam ba akubyn ar ajo tẽn me bakukãmãre kabên'ÿr ar ajo bôx. Me bakukãmãre kwÿ ne mebê Metĩndjwÿnh kukwakam kabên jarênh djwÿnhkumrêx ne kukwakam memã kabên jarê. Bênjadjwÿr djwÿnh akubyn bôxmã arê ba ajte jakam ar amã arê. Bênjadjwÿr djwÿnh, gwaj bapytâr djwÿnh ne ar ijano bar memã 'ã idjujarênh ar iba. Dja gar ajte ar badjwÿ ar ima. Ar ije amrêbê Bênjadjwÿr djwÿnh kukwakam ar amã katåt aje amijo aba'ã karôja dja gar ajte ama. Ar aje Bênjadjwÿr djwÿnh akubyn bôxmã mar tÿx rã'ã kadjy ba 'ÿr ar ajo bôx ne ajte ar amã arê. Ba ar amex man ã ar amã arênh ane.

³Dja Bênjadjwÿr djwÿnh akubyn bôx 'ÿr nhym me arÿm gwaj bajaprÿ:. Ja kumrêx ba ar amã arê. Dja me mÿjja punubit'ã amim karôn kum axwe prã:m ar ban arÿm gwaj bajaprÿo ban ⁴gwaj bamã,

—Je tô nhÿnh? Djãm kute aminhô akati jarênhja on bôxmã got? Adjãkamã mÿjja kunĩ kute aminhipêx kraxkôt kute amijo môr tãmtã rã'ã. Me bakukãmãre kêt mÿrbê mÿjja tãm rã'ã. Djãm on ô akati bôxmã got? ane. Dja me ã gwaj bajaprÿo ane.

⁵Djãm mrãmri ne we mÿjja kunĩ rã'ã nhym we Jeju akubyn bôx kêt mã? Kati. Ga, adjãkamã Metĩndjwÿnh kabên kôt kãjkwa katorja pumũ. Nhym kam ajte kabên kôt pyka ngô kurũm katon ngô kôt aminhipêx.

⁶Nhym kam kabênkôt ajte ngô pykao ajkamuw n o aknon prĩne o ajkê. Ja ne me kute mar prãm kêt kumrêx. Ne kam we mÿjja kunĩ rã'ã jarê. We Jeju akubyn bôx kêt jarê. Kati. Metĩndjwÿnh kabênkôt dja Jeju akubyn bôxkumrêx.

⁷Nhym be, jakam Metĩndjwÿnh ta amikabênkôt amim kãjkwamê pyka'ã ma. Dja kabênkôt xêr. Metĩndjwÿnh dja ï memã axweo pãnh. Me kum Metĩndjwÿnh kĩnh kêtjamã axweo pãnh. Nhym kam me arÿm me biknor tokry djãkam akuno. Kamã, dja kãjkwamê pyka xêr.

⁸⁻⁹Me kwÿ ne me amim,

—Bênjadjwÿr djwÿnh akubyn bôxmã amijarên kam ate ari amikràò ba. Nãm me ã amim ane. Djãm mrãmri ne Bênjadjwÿr djwÿnh amikràò ba? Kati.

Akmere, àpnhĩre ar, ba ar amã mỳjja jarẽ. Dja gar amim markumrẽx. Dja kàjkwakam Bẽnjadwỳr djwỳnh'ã akati pydjibit apêx. 'Ã akati pydji apêx ja ne kute gwaj bajã amex krãptĩ: arỳm apêx pyrãk. Ba ajte ar amã arẽ. Dja gwaj bajã amex krãptĩ:o kute 1.000 pyrãk apêx. Gwaj bajã amex krãptĩ ja ne kute Bẽnjadwỳr djwỳnh'ã akati pydjibit apêx pyrãk. Bẽnjadwỳr djwỳnh ne kute amikrão ba kêt. Kabẽn pydji ne arẽ. Amikabẽn kôt dja bôxkumrẽx. Mỳkam ne amrêbê bôx kêt? Bir, nãm ngryk tôn amiwỳr me amãr 'liry amim,

—Djãm me'õ biknor ba kam ikĩnhmã? Kati. Me kunĩ amikam kaprĩren wãnh amijaxwemã irern kute iwỳr amijo akêxkambit dja ba ikĩnhkumrẽx. Nãm ã amim anen amiwỳr me amãr 'liry. Kam ne amrêbê bôx kêt. Nhy m be, dja mrãmri akubyn bôxkumrẽx.

¹⁰Dja te amiwỳr me amãr 'liry arỳm gwaj bajaêrbê bôxkumrẽx. Bẽnjadwỳr djwỳnh bôx djã nhõ akati dja me'ỳr bôx kute mrãmri ne akamãtkam me àkĩnhĩ me aêrbê bôx pyrãk. Dja me'ỳr bôx nhy m kàjkwakam mỳjja arỳm kêt ne, kàjkwakam mỳjja kunĩ: kêt ne. Dja mỳjja rãrãk tỳ:x ne arỳm kàjkwa nhĩ'ãm tẽn akuno. Pykadjwỳ dja arỳm xêr. Pykakam me kute mỳjja nhipêxdjwỳ dja xêr. Mỳjjao pyka kute aminhipêx djadjwỳ dja kunĩ xêr. Dja kuwy kangro tỳ:x nhy m arỳm mỳjja kunĩ: xêr nhy m arỳm kêt ne.

¹¹Ga, mỳjja kunĩ kêt mãja ma. Ar aje ja markam mỳj dja gar on jakam amijon? Bir, dja gar on Metĩndjwỳnh kabẽn man kôt ar amijo aban amextiren ajaxwe kêt. Kwãrik wãnh me kum Metĩndjwỳnh kĩnh kêtja kukràdjã kôt amijo aba kêt. ¹²Dja gar amiwỳr kam aman mã amim,

—Gê Metĩndjwỳnh nhõ akati on bôx, ane. Metĩndjwỳnh nhõ akatikam dja kàjkwa pòk tỳx ne arỳm xêr. Nhy m mỳjjao kàjkwa nhipêxdjwỳ dja arỳm kunĩ ôr, kangro tỳ:x ne arỳm ôr.

¹³Nhy m be, gwaj ba mỳj ne gwaj amiwỳr kam ama? Bir, gwaj amiwỳr kàjkwa nykam ama. Gwaj amiwỳr pyka nykam ama. Metĩndjwỳnh kute gwaj bamã kabẽn pydjin arênhja gwaj kam ama. Pyka arỳm nykam djãm kam me axwe'õ ar ba? Arkati. Me axwe kêtbit dja me kam ar ba.

¹⁴Mỳkam ne ba ar amã ja jarẽ? Bir, dja bôx gar ajaxwe kêt nhy m arỳm ar apumũ. Ar ajaxwe kêt kôt ar apumũ gar arỳm adjumar mex. Nãr, dja bôx gar ajaxwe nhy m arỳm ar apumũ. Ar ajaxwe kôt ar apumũ gar arỳm adjumar punu. Kam dja gar ajaxwe kêt kadjy amijãno dja. Nhy m bôx gar prĩne kum amex kute mrãmri ne kubêkà'a ngrã kêt kumrẽx prĩne memã mex pyrãk.

¹⁵Kam, kwãrik wãnh mekôt amim,

—Bẽnjadwỳr djwỳnh akubyn bôxmã amijarẽn ate amikrão ba, anhỳr kêt. Dja gar amim,

—Bẽnjadwỳr djwỳnh kute me utàr prã:m. Kam ne ngryk tôn amiwỳr me amãr 'liry. Kam ne bôx kêt rã'ã, ane. Dja gar ã amim ane.

Nãm ã gwaj bakamy Paurdjwỳ ar amã ane. Metĩndjwỳnh kute kum amak bônkhôt ar amã ane. Kute pi'òk no'òkkôt ã ar amã ane. ¹⁶Õ pi'òk kunikôt ne mỳjja ja'ã memã pi'òk no'òk ne. Kam kabẽn kwỳ ne me kute marbê mebê tỳxi.

Nhym kam me kwỳ amak mex kêtja kute amim Metĩndjwỳnh mar kêtka
memã kupa'ã arẽn prĩne o ajkẽ. Ne kam Paur kabẽn kupa'ã ta memã amikabẽn
jarẽ. Nãm me ã Metĩndjwỳnh kabẽn'ã pi'òk no'òkja kunĩ jarẽnho ane. Nãm me
kupa'ã arẽn arỳm prĩne o ajkẽn Metĩndjwỳnh kabẽn kupa'ã ta memã amikabẽn
jarẽ. Dja me kupa'ã arẽnho ba:n arỳm me biknor tokry djàkam akuno.

¹⁷Kam, akmere, àpnhĩre ar, ar aje arỳm ikabẽn ja markam amijã ano tỳx.
Nok ga ren ar me axwe kôt ar amijo aban ren mekôt ajaxwe. Metĩndjwỳnh
kupa'ã ne me amijo ba. Ar ga ne gar tu amim Metĩndjwỳnh kabẽn
markumrẽx. Nok ga ren ar me kabẽn man ren kupa'ã amijo aba. ¹⁸Dja
gar Bẽnjadjwỳr djwỳnhbê Jeju Kritu mexo amex tẽ. Kubẽ ne gwaj bapytâr
djwỳnh. Dja gar mexo amex tẽn amũ o amikamẽn arỳm amexkumrẽx. Ne
mar mexo tẽ:n amũ o amikamẽn arỳm mar rax ne. Gẽ me jakam kum rax
jarẽn kum rax jarẽn rã'ã: rã'ã ne. Tãm ne ja.